

lib. 2. cap. 8. in Concilio Sardicensi de Episcopatus gradu dimotus est.

CVRTA Antonino in Itinerario, vulgò *Curta*, adhuc pagus Hungaricæ circa Danubium. *Crescens* huius Episcopus primis sæculis legitur apud Lazium lib. 2. de Repub. Romana, de cuius autoritate Lectori iudicium sit.

NOVIODVNVM Antonino in Itinerario, ciuitas Sauræ, apud quam sedem fuisse Episcopalem sub Arcadio & Honorio testatur Lazijs ibid. sed nullum huius Episcopum nominat.

GARPIS Ptol. lib. 3. cap. 16. vulgò *Carpen*. *Secundum* huius Episcopum fuisse sub Decio tradit Lazijs ibidem.

CIBALIS Zosimo lib. 2. hodie *Palma*. *Eusebius* huius Episcopus passus est sub Diocletiano Imperatore, ex gestis sancti Pallionis Martyris, & *Donatus* sub Decio fuit, teste Lazijs.

STRIDON D. Hieronymo, cuius patria fuit, vulgò *Sdrigna*. *Domnus* Stridonensis Episcopus subscripsit Concilio Nicæno primo.

SISCIA Æthico in Cosmographia, vulgò *Sissech*. *Constantius* Episcopus Siscianensis legitur in Concilio Aquileiensi sub Damaso.

SINGIDONVM vrbs Pannoniæ inferioris Aurelio Victori in Historia Imp. vulgò *Sigetincz*, Lazijs. *Ursacius* huius Episcopus dicitur apud Socratem lib. 1. cap. 20. qui ciuitatem illam constituit in Pannonia superiori, sed mendosè. An autem differat à Singiduno cuius situs est in confinibus Mœsiæ superioris, & Pannoniæ inferioris, alij aliter sentiunt. Ego eandem ciuitatem fuisse ex hoc conijcio, quod idem *Ursacius* etiam dicatur Episcopus Syngidonis Mœsiæ apud Theodoretum lib. 2. cap. 8. Reuera apud Ptolemæum reperitur tantum Singidunum in Mœsia: sed fortè tribuitur Pannoniæ à Socrate, quod esset sub Pannoniarum Metropolitano Sirmiensi, & in vtriusque confinibus.

PANNONIA. SVPERIOR.

SABARIA Antonino, Germanis vulgò *Szombatel*, patria sancti Martini, Episcopalis sub Arcadio & Honorio, vt dicitur à Wolfango Lazijs lib. 2. de Repub. Romana, sed nullum huius Episcopum nominat, nec vllum apud veteres legi.

SCARABANTIA, alijs Sacarbantia, Ptol. lib. 3. cap. 15. vulgò *Scapring*. *Quirinum* huius Episcopum fuisse sub Philippo scribit Lazijs ibid.

VINDOBONA Antonino in Itinerario, vulgò *Wien*. Apud eam, sedē Episcopalem fuisse Arcadij & Honorij temporibus, scribit Lazijs in Catalogo Episcopatum Illyrici, qui hac ætate fuerunt; necnon & alij Germanicarum rerum scriptores, qui sanctum Seuerinum Pannoniarum Apostolum circa annum Christi 464. huius primum Episcopum nominant. Sed quidquid sit, diu sine Episcopo fuit, & vsque ad tempora Friderici 3. Imperatoris, qui, Cathedrali Basilica restaurata, huic Leonem Episcopum ordinari curauit, teste Vuiguleo Hund in Metropoli Salisburgensi.

CELIA, alijs Celeia, legitur apud Antoninum ibid. vulgò *Cylli*. Inter Episcopales sedes sub Arcadio & Honorio numeratur à Lazijs, sed huius Episcopum *Tenacem* ex Concilio Aquileiensi nominat, qui tamen in eius actis non legitur.